



*Kamis, 19 Agustus 2021*

**Ogen: Johanes 4:16-42**



**Ngalemi erkiteken keleng ate**



“*Kasih pasti lemah lembut, kasih pasti memaafkan, kasih pasti murah hati, kasihMu kudus tiada batasNya. Ajarilah kami ini saling*

*mengasihi, ajarilah kami ini saling mengampuni, ajarilah kami ini kasihMu ya Tuhan, kasihMu kudus tiada batasnya.*” Lagu enda usur kal si endeken ras isina cukup tangkas. Keleng ate Kristus si enggo isehkenNa man banta eme jadi usihen ras pergegeh guna banci ngalemi salah kalak man banta. Ugape belinna salah kalak, adi lit keleng ate bas kita, ngasup kita ngalemisa. Kalak si lanai kin ngasup ngalemi, seri ras lanai lit keleng ate bas pusuhna. Tuhan ngalemi diberu kalak Samaria, si kecibal jabuna pe jadi penungkunen denga. Ieteh Tuhan kecibalna e, enggo lit lima perbulangenna tapi sada pe la sah rikutken aturen adat ras agama. Perbulangenna si genduari e pe labo denga sah. Tapi Tuhan Jesus la ngakimi, la ikatakakenna man jelma si enterem. Sengget diberu e erkiteken ieteh Tuhan kerna kecibalna, teridah man bana maka Jesus e labo manusia biasa. Emaka ikatakaken Jesus maka IA me si ngasup mereken kegeluhen. Man kalak si jera dengen nadingken dosana ndatken keterkelinen. Jesus mereken kesempatan man diberu e guna robah ras jera i bas lagu langkah si la payo. Mbelin kal keleng ate Tuhan man bana, enggo pe mbue kesalahen ras dosana, la Tuhan ertaktak. Keleng ate Tuhan Jesus e maba perubahen i bas geluhna. Turah ukurna mehuli nurikensa ka man anak kutana, seh terberita kerna Jesus i belang-belang kuta Samaria. Tangkas tuhu keleng ate namburi kerina dosa.